

四庫全書

史部

欽定四庫全書

史部

唐律疏義卷二

詳校官侍講學士臣法式善

編修臣程嘉謨覆勘

總校官編修臣王燕緒

校對官編修臣羅修源

謄錄監生臣朱天秀

欽定四庫全書

史部十三

唐律疏義

政書類五

法令之屬

提要

臣

等謹案唐律疏義三十卷唐太尉揚州都

督趙國公長孫無忌奉勅撰風俗通稱皋陶

謨虞造律尚書大傳稱夏刑三千五百是為

言律之始其後魏李悝著法經六篇一盜法

二賊法三囚法四捕法五雜法六具法商鞅

受之以相秦漢蕭何益戶興廩三篇為九篇
叔孫通又益旁章十八篇張湯越宮律二十
七篇趙禹朝律八篇合六十篇馬融鄭康成
皆嘗為之章句魏世刪為漢律定增十九篇
就故五篇合十八篇晉復增損為二十篇南
北朝互有更改漸近繁密隋文帝開皇三年
勅蘇威牛宏等更創新律除死罪以下千餘
條定留五百條凡十二卷一名例二衛禁三

職制四戶婚五廩庫六擅興七盜賊八鬪訟
九作偽十雜律十一捕亡十二斷獄史稱其
刑網簡要疎而不失唐太宗詔房元齡等增
損隋律降大辟為流者九十二流為徒者七
十一而大旨多仍其舊高宗即位又命長孫
無忌等偕律學之士撰為義疏頒行之即是
書也論者謂唐律一準乎禮以為出入得古
今之平故宋世多採用之元時斷獄亦每引

為據明洪武初用儒臣同刑官進講唐律後
命劉惟謙等詳定明律其篇目亦準於唐至
洪武二十二年刑部請編類頒行始分吏戶
禮兵刑工六律而以名例冠於篇首

本朝折衷往制垂憲萬年

欽定大清律例明簡公平實永為協中弼教之盛
軌臣等嘗伏讀而紬繹之凡唐律篇目今所
沿用者有名例職載賊盜詐偽雜犯捕亡斷

獄諸門其唐律合而今分者如戶婚為戶役
婚姻廐庫為倉庫廐牧關訟為關毆訴訟諸
門其名稍異而實同者如衛禁為宮衛擅興
為軍政諸門其分析類附者如關津留難諸
條唐律入衛禁今析入關津乘輿服御物事
應奏不奏驛使稽程以財行求諸條唐律俱
入職制今分析入禮律之儀制吏律之公式
兵律之郵驛刑律之受贓謀殺人諸條唐律

入賊盜今析入人命毆詈祖父母父母諸條
唐律並入鬪訟今析為兩條分入鬪毆罵詈
又姦罪市司評物價盜決隄防毀大祀邱壇
食田園瓜果諸條唐律俱入雜律今分析入
刑律之犯姦戶律之市廛田宅工律之河防
禮律之祭祀益斟酌畫一權衡允當迨今日
而集其大成而上稽歷代之制其節目備具
足以沿波而討源者要惟唐律為最善故著

之於錄以見監古立法之所自焉其書為元
泰定間江西儒學提舉柳賢所校刊每卷末
附以江西行省檢校官王元亮釋文及纂例
亦頗可以資叅訂也乾隆四十六年十一月
恭校上

總纂官

臣紀昀
臣陸錫熊
臣孫士毅

總校官

臣陸費墀

金匱要略

提要

唐律疏義序

故唐律十二篇非唐始有是律也自魏文侯以李悝為師造法經六篇至漢蕭何定加三篇總謂九章律而律之根莖已見曹魏作新律十八篇晉賈充增損漢魏為二十篇北齊後周或備苞其類或因革其名所謂十二篇云者裁正於唐而長孫無忌等十九人承詔製疏勒成一代之典防範甚詳節目甚簡雖總歸之唐可也蓋姬周而下文物儀章莫備於唐始太宗因魏徵一言遂

以寬仁制為出治之本中書奏讞常三覆五覆而後報
可其不欲以法禁勝德化之意皎然與哀矜愍恤者同
符史言有司定律五百條分十二卷即篇為卷是已今
定次三十卷者長孫製義疏時固已增多義疏出永徽
初去貞觀應未遠其後定令刪格編式各隨世損益科
條無藝大抵皆原於律矣然則律雖定於唐而所以通
極乎人情法理之變者其可畫唐而遽止哉國家立經
陳紀迪德踐猷較諸近世之中稽合唐制為多故凡垂

之為甲令著之為事比無非忠厚惻怛之所形累聖重
光何其甚似乎太宗也予嘗脩數禮官陪在廷末議見
吏抱成法寘前曰律當如是不當如彼雖辯口佞舌莫
不帖帖順聽無敢出一語為異及按而視之則本之唐
以志其常參之祖宗審斷以傳其變非常無古非變無
今然而必擇乎唐者以唐之揆道得其中乘之則過除
之即不及過與不及其失均矣嗚呼法家之律猶儒者
之經五經載道以行萬世十二律垂法以正人心道不

可廢法豈能以獨廢哉彼謂除參夷連坐之罪作見知部主之條為蕭張控制天下之一術其論抑淺末矣予何足以知之因其理之在人心者而竊窺之耳江西在聲教漸濡之內諸學經史板本略具而律文獨闕予聞請於廉訪使師公曰禮取其初一物出禮入刑之論固將以制民為義而非以囚民為厲也吾欲求故唐律疏義稍為正訛緝漏刊之龍興學宮以庶幾追還時會讀法之遺公儻有意乎公亟語諸寮案咸應曰諾而行省

檢校官王君長卿復以家藏善本及釋文纂例二書來
相其役公欣然命出公帑所儲復入學租錢以供其費
踰月緒成因執筆冠篇而且以識公恤刑之本心無往
而不在也若曰鑄要鼎作爰書以取譏於世則予豈敢
泰定四年秋七月既望文林郎江西等處儒學提舉柳
贊謹序

律起於黃鍾權衡度量生焉是律者法度之所自出故
刑名家亦謂之律五等之刑銖校絲比權輕重時損益

與天地之氣相為貫通陽一噓而萬物生陰一吸而萬物死故古人謂未押字以前屬陽押字以後屬陰陽陰不在天而在于我是故先王慎之唐虞畫衣冠而民不犯成周司馬教民讀法亦象刑遺意子產鑄刑書而叔向乃非之蓋懼其棄禮忘義而一徵於書則薄矣漢興三章之約不足以治天下故命蕭何制律後世酌而行之國家律書未頒比例為斷然例本於律參其意不泥其文爾汴梁人王長卿精刑名之學以唐律析為橫圖用

太史公諸表式經緯錯綜成文五刑三千如指諸掌其
用心亦仁矣哉雖然德禮本也政刑末也善用者德禮
行乎政刑之間不善者反此故曰有闢雖麟趾之意然
後可以行周官之法度余請以此為唐律纂例序泰定
二年乙丑秋七月下弦日眉山劉有慶謹序

唐律釋文序

夫禮者民之防刑者禮之表二者相須猶口與舌然禮
禁未萌之前刑制已然之後使民在宥各遂其生聖人

用之不得已也譬夫銜轡者馭其要駕篙棹者撥乃橫
流有國有家廢之莫得惟聞刑措豈去刑書然聽斷之
間慮生疑惑從輕則惠姦何益加重則反善猶難爰自
周秦歷於南北惟有刑目固定條綱雖國僑鑄鼎叔向
猶非況屬後人寧無差誤天厭前代實命我皇聖慈惟
則是恤冀天樂舉觴遂詔刑官刪修墜典以寬猛相濟
以輕重隨時一協公平更無迷謬然刑統之內多援引
典故及有艱字法胥之徒卒不能辯又有新入仕員素

乖習熟至臨斷案事一決於胥胥又無識豈不有非聖
慈者哉且如問云加杖二百比徒四年部曲與奴婢不
等義服與正服有乖若此之差例皆多目故北山貫治
子治經之暇得覽金科遂為釋文非辯其義此蓋有志
於民者也又見不自誣舉仕仍為叙引聯誌歲時云爾
至正辛卯孟春



進律表疏

臣無忌等言

秦以前君臣通稱朕尚書虞書帝曰來禹汝亦昌言
禹曰帝予何言予思日孜孜則是臣於君前尚稱予
也秦制天子稱朕臣下稱臣漢以後因之唐儀制令
皇太子以下率土之內於皇帝皆稱臣唐本傳長孫
無忌字輔機性通悟博涉書史始高祖兵渡河進謁
長春宮授渭北道行軍典籤乃太宗文德順聖皇后

長孫氏之兄也因輔政與李勣等一十九人撰成律
疏上表以進

臣聞三才既分法星著於元象

易說卦立天之道曰陰與陽立地之道曰柔與剛立
人之道曰仁與義兼三才而兩之晉天文志太微帝
座南蕃中二星曰端門東曰左執法廷尉之象也西
曰右執法御史大夫之象也又貫索九星賤人之牢
也牢口一星為門欲其開九星皆明天下獄煩七星

見小赦六星五星見大赦動則斧鑕用中空則更無
又亢四星天子內朝總攝天下秦事理獄錄功也又
參伐十星主斬刈又為天獄此言自天地人既分之
後則刑法之星上著於天文也

六位斯列習坎彰於易經

易八卦三畫每卦之上各重八卦為六十四卦則每
卦六畫初二三四五上為六位易說卦六位而成章
習坎卦體坎上坎下為重習也坎陰也陷也上六係

於徽纆寘於叢棘重坎至於上六陰之極陷之深故
有刑獄之象如係之徽纆而寘於叢棘之中也又爾
雅釋言坎律銓也郭璞註坎卦主法法律皆所以銓
量輕重也

故知出震乘時開物成務

易說卦帝出乎震乾卦時乘六龍以御天係辭曰開
物成務王弼註易通天下之志成天下之務

莫不作訓以臨函夏垂時以牧黎元

訓亦教也函方也方夏中國也文選七命曰函夏謚
靜書序曰足以垂世立教牧養也左傳曰天生民而
樹之君使司牧之黎元民也黎黑猶秦言黔首也漢
文紀元元之民師古註元元善意也光武紀黎元所
歸黎庶也元元猶言喁喁可矜之辭

昔周后登極呂侯闡其茂範

周穆王享國百年命呂侯為司寇作書訓夏贖刑以
誥四方名呂刑闡開茂大範法也

虞帝納麓臯陶創其彛章

舜典納於大麓孔安國註麓錄也堯使帝舜大錄萬幾之政大禹謨曰臯陶惟茲臣庶罔或干予正汝作士明於五刑創始制也彛常章典也

大夫之述三言金篆騰其高軌

左傳昭公十四年晉邢侯與雍子爭鄩田久而無成士景伯如楚叔魚攝理韓宣子命斷舊獄罪在雍子雍子納其女於叔魚叔魚罪邢侯邢侯怒殺叔魚與

雍子於朝宣子問其罪於叔向叔向曰三人同罪施
生戮死可也雍子賂以買直鮒也鬻獄邢侯專殺其
罪一也已惡而掠美為昏貪以敗官為墨殺人不忌
為賊夏書曰昏墨賊殺臯陶之刑也從之乃施邢侯
而尸雍子與叔魚於市仲尼曰叔向古之遺直也治
國制刑不隱於親三數叔魚之惡不為末減曰義也
夫可謂直矣平丘之會數其賄也以寬衛國晉不為
暴歸魯季孫稱其詐也以寬魯國晉不為虐邢侯之

獄言其貪也以正刑書晉不為頗三言而除三惡
加三利殺親益榮猶義也夫金篆者秦以前未有隸
楷故字皆用篆言篆字而以金鑄之鍾鼎而紀其功
也軌車轍已行之迹騰表異之也言大夫議刑之三
言可以著之金篆而表其已行之迹也

安衆之陳九法玉牒播其宏規

魏文侯師於李悝集諸國刑典造法經六篇一盜法
二賊法三囚法四捕法五雜法六具法又漢相蕭何

更加惺所造戶興廡三篇謂九章之律是為九法玉牒者文選廣絕交論書玉牒而刻鍾鼎又魏都賦極棟宇之宏規規者所以為圓法度之器也言蕭何安衆之陳九法可以書之玉牒而播揚其宏大之規也前哲比之以隄防往賢譬之以銜勒

前漢刑法志制禮以止刑猶隄防溢水也後漢虞詡曰刑罰者人之銜勒也

輕重失序則繫之以存亡

白氏六帖刑法門議論輕重之序慎測淺深之量言
用刑輕重失其序則繫民命之存亡

寬猛乖方則階之以得喪

左傳昭公二十年鄭子產有疾謂子太叔曰我死子
必為政唯有德者能以寬服民其次莫如猛夫火烈
民望而畏之故鮮死焉水懦弱民狎而翫之則多死
焉故寬難疾數月而卒太叔為政不忍猛而寬鄭國
多盜取人於荏蒲之澤太叔悔之曰吾早從夫子不

及此興徒兵以攻荏蒲之盜盡殺之盜少止仲尼曰
善哉政寬則民慢慢則糾之以猛猛則民殘殘則施
之以寬寬以濟猛猛以濟寬政是以和及子產卒仲
尼聞之出涕曰古之遺愛也階所由之梯階言寬猛
乖其方術則由之而有得失也

泣辜慎罰文命所以會昌

劉向說苑禹出見辜人問而泣之史記夏禹名文命
文選蜀都賦天帝運期而會昌

斮脛剖心獨夫於是盪覆

書秦誓今商王受斮朝涉之脛剖賢人之心冬月見
朝涉水者謂其脛耐寒斬而視之比干忠諫紂曰吾
聞賢人之心有七孔剖而觀之又曰獨夫受孟子曰
殘賊之人謂之一夫一獨也盪覆也言紂為周武王
所滅也

三族之刑設禍起於望夷

周罪人不孥謂罪止其身不及其家之人秦始皇作夷

三族法謂父族母族妻族也望夷宮名趙高令壻閭樂弑秦二世之地謂秦因設三族之刑而身弑國亡也

五虐之制興師亡於涿鹿

史記軒轅乃習用干戈以征不享諸侯咸賓從而蚩尤最為暴虐莫能伐應劭曰軒轅黃帝時蚩尤作亂不用帝命遂作五虐之刑大刑用甲兵其次用斧鉞中刑用刀鋸其次用鑕笞薄刑用鞭朴軒轅乃徵師

諸侯與蚩尤戰於涿鹿之野服虔曰涿鹿山名在涿鹿郡遂擒殺蚩尤身首異處

齊景綱峻時英有踊貴之談

時英指晏子而言晏嬰字平仲事齊景公左氏傳景公欲更晏子之宅晏子辭景公曰子居近市識貴賤乎於是景公繫於刑有鬻踊者故對曰踊貴屨賤既已告於君故與叔向語而稱之景公為是省於刑君子曰仁人之言其利溥哉晏子一言而齊侯省刑踊

刑者之屨也言受刑者多故踊為之貴也

周幽獄繁詩人致菀柳之刺

毛詩小雅菀柳刺幽王也暴虐無親而刑罰不中也所以當塗撫運樂平除慘酷之刑

魏闕當塗高乃漢末曹氏代漢讖語當塗撫運言魏應運而為君也魏司徒王朗字景興封樂平侯時鍾繇上疏欲復肉刑詔令公卿共議朗議以為繇欲輕減大辟之條以增益刑之數夫五刑之屬著在律

科自有減死一等之法不死即為減施行已久不待
遠假斧鑿於彼肉刑然後有罪次也前世仁者不忍
肉刑之慘酷是以費而不用不用以來歷年數百今
復以之恐所減之文未彰於萬民之目而肉刑之問
已宣於寇讎之耳非所以來遠人也議者百餘人與
朗同者多帝以吳蜀未平寢

金行提象鎮南削煩苛之法

晉以金德王天下故曰金行提象言取類於金也杜

預字元凱為鎮南大將軍與車騎將軍賈充等定律
令既成預為註解乃奏之曰法者蓋繩墨之斷例非
窮理盡性之書也故文約而例直名省而禁簡例直
易見禁簡難犯易見則人知所避難犯則幾於刑措
古之刑書銘之鍾鼎鑄之金石所以遠塞異端使無
淫巧也今所註皆網羅法意格之以名分使用之者
執名例以審趨舍伸繩墨之直去析薪之理也詔頒
行於天下

而體國經野御辨登樞

周禮惟王建國辨方正位體國經野體國者營其國
之宮城門涂如身之有四體經野者治其野之丘甸
溝洫如機之有經緯登樞者北極為天樞居其所而
衆星拱之人君之象故人君即位曰登極亦曰登樞
莫不崇寬簡以宏風樹仁惠以栽化

書大禹謨臨下以簡御衆以寬詩序風風也上以風
化下樹立也易繫辭化而裁之

景胄以之碩茂寶祚於是克崇

尚書命汝典樂教胄子胄子長子也適子也景大也
碩亦大也易繫辭聖人之大寶曰位祚國祚也崇高
也言國家崇寬簡樹仁惠則本支繁茂國祚延長也
徽猷列於緬圖鴻名勒於青史

徽美也猷道也文選贈劉琨詩加其忠直宣其徽猷
緬桑初生之色即淺黃色也文選序飛文染翰則卷
盈乎緬帙言人君美道具列於圖書鴻名大名也前

漢司馬相如封禪書前聖之所以永保鴻名青史者
古無紙凡書辭者殺竹汗為簡書之文選江淹書並
圖書史言人君之大名必勒書於青史

暨炎靈委御人物道銷

暨者及也炎者漢也漢以火德王天下故曰炎靈者
漢靈帝也委御者文選魏都賦劉宗委馭漢至唐歷
代已多此借漢以喻隋末之亂君失其馭而一時人
物之道銷喪也

霧霧三光塵驚九服

翳者蔽也三光者纂要曰日月星謂之三光以喻人君之明言羣邪如霧以蔽君之明也周書辨九服之國方千里乃其外曰侯服甸服男服采服衛服蠻服夷服鎮服蕃服是名九服言煙塵徧驚於九服之內也

秋卿司於邦典高下在心

周禮六典五曰刑典以誥邦國又秋官司寇帥其屬

以佐王刑邦國劉馮事始舜以臯陶作士乃理獄之
官周禮為士師秦以李斯為廷尉漢因之景帝嘗改
為大理梁為秋卿唐為司刑左傳曰高下在心謂不
遵法度而用心不公也

獄吏傳於爰書出沒由已

史記張湯傳湯父為長安丞出湯為兒守舍還為鼠
盜肉怒笞湯湯掘窟得盜鼠及餘肉劾鼠掠治傳爰
書訊鞠論報並取鼠與肉磔堂下父見之視其文辭

如老獄吏大驚遂使書獄蘇林曰傳謂傳囚也爰易也以此書易其辭處鞠窮也張晏曰傳考證驗也爰書自證不知此言反受其罪訊考三日復問之知與前辭同也鞠一吏為讀狀論其報行也此言獄吏傳爰書出入罪人皆由已也

內史溺灰然而被辱

史記御史大夫韓安國字長孺梁城安人也其後安國坐法抵罪縣獄吏田甲辱安國安國曰死灰獨不

然乎甲曰然即溺之居無何梁內史闕漢遣使拜安國為梁內史起徒中為二千石甲亟走安國曰甲不就官我滅而宗甲因肉袒謝安國笑曰可溺矣公等足為治乎卒善遇之

丞相見牘背而行賕

史記漢絳侯周勃免相就國歲餘每河東守行縣至絳周勃自畏恐誅常披甲令家人持兵以見之其後有人告勃欲反文帝四年下廷尉廷尉下其事長安

逮捕勃治之勃恐不知置辭吏稍侵辱之勃以千金
與獄吏獄吏乃書牘背視之曰以公主為證牘本簡也
公主者孝文帝女也勃太子勝尚之故獄吏教引為
證勃之益封受賜盡以與薄昭及繫急昭為言薄太
后太后亦以無反事文帝朝太后以帽絮提文帝帽
絮巾也太后曰絳侯綰皇帝璽將兵於北軍不以此
時反今居一小縣顧反耶文帝既見絳侯獄辭乃謝
曰吏事方驗而出之於是使使持節赦絳侯復爵邑

絳侯既出曰吾嘗將百萬軍安知獄吏之貴乎賅者以財相謝也

戮逮棄灰誅及偶語

逮者及也史記衛鞅傳步過六尺者有罰棄灰於道者被刑又史記秦始皇三十四年丞相李斯上疏乃請史官非秦記皆燒之有敢偶語詩書者棄市註云禁民聚語畏其謗也

長平痛積冤之氣

史記秦將白起與趙將趙括戰於長平秦軍射殺括
括軍敗卒四十萬降武安君計前秦已至上黨上黨
民不樂為秦而歸趙趙卒反覆非盡殺之恐為亂乃
挾詐而盡坑殺之言無罪四十萬人盡誅所以痛積
冤之氣也

司敗切瘐死之魂

司敗者獄官也論語陳司敗問昭公知禮乎漢宣帝
詔繫者或以掠辜若饑寒瘐死獄中朕甚痛之其令

郡國歲上繫囚以掠若瘐死者所主坐召御史課殿
最以聞囚徒饑寒病死曰瘐死

遂使五樓之羣爭迴地軸十角之旅競入天田

後漢諸賊銅馬大槍尤來上江青犢校檀五幡五樓
富平獲索皆賊名號也春秋括地象云地有三千六
百六軸十角者此皆形容隋將亡唐未興之時天下
大亂也周禮五百人為旅前漢天文志龍左角為天
田龍祥也晨見則祭之然此天田特借用其字謂兵

亂於天子之境土也

國步於是艱難刑政於焉弛紊

詩桑柔國步蔑資朱子云步猶運也刑政者論語道之以政齊之以刑文選辨亡論皇綱弛紊

殷憂侯來蘇之后多難佇撥亂之君

書仲虺之誥攸徂之民室家相慶侯予后后來其蘇
註湯所往之地民皆喜曰待我君來其可蘇息多難
詩訪落曰未堪家多難漢高祖紀羣臣曰帝起微細

撥亂反正佇者候也

大唐握乾符以應期得天統而御歷

文選東都賦握乾符闡坤珍又魏都賦應期運而光
赫言大唐之君執握天受命之符以應期運也前漢
高祖贊曰旗幟尚赤協於火德自然之應得天統矣
御治也歷數也

誅阪泉之巨猾勦丹浦之凶渠

史記黃帝教熊羆貔貅羆虎以與炎帝戰於阪泉之

野三戰然後得其志文選應劭詩丹浦非樂戰劉良
曰唐虞時丹浦人不服帝征而克之

掃旬始而靜天綱廓妖氛而清地紀

文選東京賦橈槍旬始羣凶靡餘旬始妖星也晉紀
總論曰天綱解紐又還舊園詩曰大明盪妖氛又地
理志山河分兩界有南紀北紀

朱旗乃舉東城高滅楚之功

朱旗者文選述高紀贊神母告符朱旗乃舉又漢五

年圍項羽垓下夜聞漢軍皆楚歌知盡得楚地羽與數騎走是以兵大敗灌嬰追斬東城言唐之勲德亦高於此也

黃鉞裁麾西土建翦商之業

書牧誓武王與紂戰於牧野甲子昧爽王朝至於商郊王左仗黃鉞右秉白旄以麾曰逖矣西土之人詩公劉篇實始翦商翦滅也言唐之功業亦若此總六合而光宅包四大以凝旒

六合者四方上下也書堯典光宅天下言堯有光明之德覆天下如屋宅四大者老子云道大天大地大王大域中有四大王居其一焉禮記玉藻曰天子玉藻十有二旒

異域於是來庭殊方所以受職

文選李陵書死為異域之鬼詩常武篇殊方來庭又文選東都賦殊方別區又與陳元伯書曰解辯請職航少海以朝絳闕梯崑山以謁紫宸

大舟曰航揚雄夏州箴曰航海三萬東牽其竿山海經無臯之南望幼海郭璞云幼即小也文選與孫皓書稽顙絳闕山海經崑崙山廣萬里高一千里荊州星占北辰一名天關一名北極北極者紫宮天主也天子所居曰宸故曰紫宸

椎髻之酋加之以文冕窮髮之長寵之以徽章

唐書儒學傳貞觀中高麗與百濟新羅高昌土蕃等諸國酋長遣子弟請入國學鼓篋而升講筵者八十

餘人文選石闕銘椎髻之長南越之俗也又絕交書
強越人以文冕又遊赤石詩況乃令窮髮無毛之地
在北海之北也又貴妃誅崇徽章出冢旬徽旌旗也
章旒也言南而椎髻北而窮髮皆來朝也

王會之所不書塗山之所莫紀

唐初東謝蠻入朝冠烏熊皮以金銀絡頸身披毛帔
韋皮行滕而着屨顏師古因奏言周武王時遠國歸
款周史集其事為王會篇乃命閭立本圖之禹會諸

欽定四庫全書

表

侯於塗山執玉帛者萬國

歌九功以協金奏運七政以齊玉衡

書大禹謨水火金木土穀惟修正德利用厚生惟和
九功惟叙九叙惟歌周禮鐘師掌金奏書舜典在璇
璣玉衡以齊七政以璇為璣以象天體之運轉以玉
為衡管橫而設之以窺璣以齊日月五星七政之運
行猶今之渾天儀也

律增甲乙之科以正澆俗禮崇升降之制以拯頽風

前漢宣帝曰令甲死者不可復生刑者不可復息息
生長也甲令第一乙令第二也文選策秀才文曰民
俗澆弛法令滋章禮記樂記曰升降上下周還楊襲
禮之文也拯救也頽毀也

蕩蕩巍巍信無德而稱也

論語蕩蕩乎民無能名焉巍巍乎其有成功也又曰
泰伯其可謂至德也已矣三以天下讓民無德而稱
焉

伏惟皇帝陛下

唐儀制令皇帝天子華夏通稱之陛下對揚咫尺上表通稱之應劭曰王者有執兵陳於階陛之側臣於至尊不敢指斥故呼陛下以告之因卑以達尊之意也

體元纂業則大臨人

杜預左氏傳註凡人君即位欲其體元以居正文選東京賦況纂常業而輕天位纂繼也論語惟天為大

惟堯則之則天之大以臨兆民也

覆載並於乾坤照臨運於日月

易乾卦夫大人者與天地合其德與日月合其明與天地合其德者謂覆載也與日月合其明者謂照臨也

坐青蒲而化光四表負丹扆而德被九圍

漢書史丹伏青蒲奏事青蒲席也尚書曰光被四表禮記明堂曰天子負斧扆南嚮而立斧扆為斧屏風

於戶牖之間詩長發篇曰帝命式于九圍九州也

日旰忘餐心存於哀矜宵分不寐志在於明威

旰晚也蜀志諸葛亮上疏曰陛下劬勞帝業旰食思
政廢寢憂人書呂刑曰皇帝哀矜庶戮之無辜言唐
帝日晚忘食哀矜無辜唐李百藥曰太宗纔及日昃
必命才學之士賜以清問一夜忘疲中宵不寐書湯
誥曰將天命明威不敢赦言唐帝中夜不寢其志在
於明天之威慎用刑也

一夫向隅而責躬萬方有犯而罪已

漢書刑法志曰滿堂而飲酒有一人向隅而悲泣則一堂皆為之不樂王者之於天下也譬猶一堂之上也書湯誥萬方有罪在予一人又左傳莊公十一年曰禹湯罪已其興也勃焉

仍慮三辟攸斁八刑尚密

左傳昭公六年鄭人鑄刑書於鼎以為常法叔向始貽子產書曰夏有亂政而作禹刑商有亂政而作湯

刑周有亂政而作九刑三辟之興皆叔世也辟刑也
尚書洪範曰彝倫攸斁斁敗也八刑者周禮大司徒
以刑糾萬民一曰不孝二曰不義三曰不嫺四曰不
悌五曰不任六曰不恤七曰造言八曰亂民

平反之吏從寬而失情次骨之人舞智而陷網

前漢雋不疑為京兆尹每行縣錄囚徒有所平反毋
即喜史記杜周南陽人為廷尉史少言重遲而內深
次骨李奇曰其用罪深刻至骨又張湯杜陵人也湯

為人多詐舞智以御人言陷人於憲網

刑靡定法律無正條徽纆妄施手足安措

靡無也易坎卦係用徽纆寘於叢棘釋音劉子元云

三股曰徽兩股曰纆皆索名所以禁囚今言妄施者

刑罰不中也論語曰刑罰不中則民無所措手足自

仍慮以下至此皆言唐興之初慮恐用刑無一定之

律吏無所遵守以致刑罰不中所以命羣臣定律也

乃制太尉揚州都督監修國史上柱國趙國公長孫無

忌

司空上柱國英國公李勣

李勣字懋功曹州離狐人本姓徐武德二年從李密歸朝唐高祖喜曰勣純臣詔受黎州總管封英國公賜姓附宗正屬籍

尚書左僕射兼太子少師監修國史上柱國燕國公于志寧

于志寧字仲謚京兆高陵人太宗曰今太子幼卿當

輔以正道太子承乾數有過惡志寧欲救止之止諫
苑以諷帝見大悅賜金十斤絹三百疋凡格式律令
禮典皆與論撰賞賜鉅萬

尚書右僕射監修國史上柱國開國公褚遂良

褚遂良字登善通直散騎常侍褚亮之子博涉文史
工隸楷

銀青光祿大夫守中書令監修國史上騎都尉柳奭

柳奭字予邵蒲州人以父隋時使高麗卒焉奭往迎

喪號踊盡哀為夷人所慕

銀青光祿大夫守刑部尚書上輕車都尉唐臨

唐臨字本德京兆長安人遷侍御史俄持節披獄交
州出冤繫三千人累遷大理卿高宗嘗錄囚臨軒對
無不盡帝喜曰為國之要在用法刻則民殘寬則失
其有罪惟是折中以稱朕意永徽元年拜御史大夫
蕭齡之常任廣州都督受賕當死詔羣臣議請論如
法詔戮於朝堂臨建言羣臣不知天子所以議之之

意在律八議王族戮於隱議親也刑不尚大夫議貴也今齡之貪贓狼戾死有餘咎陛下以異於他囚故議之有司又令入死非帝舜所以用刑者不可為後世法帝然之齡之齊高帝五世孫由是免死

大中大夫守大理卿輕車都尉段寶元大中大夫守皇門侍郎護軍潁川縣開國公韓瑗

韓瑗字伯玉京兆三原人父仲良武德初與定律令建言周律其屬二千秦漢後約為五百依古則繁請

崇寬簡以示惟新於是採開皇律宜於時者定之終
刑部尚書瑗少負節行博學曉吏事

大中大夫守中書侍郎監修國史驍騎尉來濟

來濟揚州江都人篤志為文章善議論曉暢時務後
至公輔

朝議大夫守中書侍郎辛茂將朝議大夫守尚書右丞
輕騎都尉劉燕客朝請大夫使持節潁州諸軍事守潁
州刺史輕車都尉裴宏獻朝議大夫守御史中丞上柱

國賈敏行朝議郎守刑部郎中輕車都尉王懷恪前雍州蓋屋縣令雲騎尉董雄朝議郎行大理丞護軍路立承奉郎守雍州始平縣丞驍騎尉石士達大理評事雲騎尉曹惠果儒林郎守律學博士飛騎尉司馬銳等

以上十人無傳律學博士魏書曰衛揭奏刑法國家所重而私議所輕獄者人命所懸而選用者所卑請置律學博士相教授遂施行律學博士自此始也
撫金匱之故事採石室之逸書

書金匱納冊於金匱之匱中環濟要略御史中丞有石室以藏秘書文選魏都賦金匱石室藏秘書之所帝王圖籍於此藏史記太史公抽金匱石室之書書序曰採摭羣言以立訓傳

捐彼凝脂敦茲簡要

捐棄也文選秦法繁於狄荼網密於凝脂敦篤也茲此也簡略也言國家捐棄其繁密之刑而敦此簡略之法也

網羅訓詁研覈丘墳

書序垂世立教典謨訓詁誓命之文研究覈考也又
曰研精覃思博考經籍伏羲神農黃帝之書謂之三
墳言大道也少昊顓頊高辛唐虞之書謂之五典言
常道也八卦之說謂之八索求其義也九州之志謂
之九丘言九州所有土地所生風氣所宜皆聚此書
也春秋左氏傳曰楚左史倚相能讀三墳五典八索
九丘即謂上世帝王遺書也言此律疏亦網羅研覈

上世帝王之遺書也

撰律疏三十卷筆削已了

春秋傳曰孔子作春秋筆則筆削則削筆存之於牘
削去而不書也漢書曰令有司請定法削即削筆即
筆服虔曰言隨君意

實三典之隱括

周禮建三典以刑邦國誥四方一曰刑新邦用輕典
二曰刑平邦用中典三曰刑亂邦用重典荀子法行

篇曰良醫之門多病人隱括之側多枉木隱括者正曲木之器言此律書信乃三典之隱括

信百代之準繩

準繩者孟子曰聖人既竭目力焉繼之以規矩準繩以為方員平直不可勝用也準取其平繩取其直言此律書信能百代之後取其平直也

銘之景鐘將二儀而並久

文選楊修答臨淄侯牋曰銘功景鐘易繫辭曰易有

太極是生兩儀言此律書可以銘刻於國家重器之上與天地同其久遠矣

布之象魏與七曜而長懸

象魏者周禮秋官正月之吉懸刑象之法於象魏使人觀之象魏雉門兩觀也纂要云日月五星謂之七曜易繫辭懸象著明莫大乎日月言此律書布之於宮門雙闕如日月五星長懸於天也

庶一面之祝遠超於殷簡

庶者庶幾也史記殷湯出野見張網四面祝曰上下
四方皆入吾網湯曰嘻盡之矣乃去其三面祝曰欲
左左欲右右不用命乃入吾網諸侯聞之曰湯德至
矣超過也簡冊也言唐帝撰成此律書好生之德過
於殷家之簡冊也

十失之歎永弭於漢圖

漢路溫舒曰秦有十失其一尚存治獄之吏是也今
治獄者上下相繼以刻為明深者獲功名平者多後

患弭止也言有此律則永無漢人十失之歎也

謹詣朝堂奉表以聞臣無忌等誠惶誠恐頓首頓首永
徽四年十一月十九日進

永徽唐高宗年號也

欽定四庫全書

唐律疏義卷一

唐 長孫無忌等 撰

名例一 九七條

疏夫三才肇位萬象斯分

三才解見前肇始也萬象萬物也左傳物生而後
有象有象然後有滋有滋然後有數

稟氣含靈人為稱首

天以二氣五行化生萬物氣以成形惟人也得其
秀而最靈書太誓曰惟天地萬物父母惟人萬物
之靈謂稟受天地之氣而含虛靈者萬物之中惟
人為先

莫不憑黎元而樹司宰因政教而施刑法

黎元釋見前樹立也周禮六官冢宰掌邦治司徒
掌邦教宗伯掌邦禮司馬掌邦政司寇掌邦刑司
空掌邦土而冢宰兼總六官司宰謂冢宰也前漢

志劉向上疏曰教化所恃以為治也刑法所以
助治故律疏云德禮為政教之本刑法為政教之
用

其有情恣庸愚識沈愆戾

仁義禮智根於道心性也喜怒哀樂愛惡欲發於
人心情也聖賢存心養性故其情發而中節是為
上智中人以下不能率性而縱恣其情情之所發
皆是人慾故為下愚庸者庸常無能之人也沈下

沈也氣之輕清者上浮而為天重濁者下沉而為地人稟氣之清者則見識高明稟氣之濁者見識沈滯不加澄汰之功則其識愈下所為必陷於罪戾矣

大則亂其區宇小則睽其品式

文選石闕銘區宇又安區宇天下也漢宣紀贊樞機周密品式具備品式猶言法度也此言犯法之人大則為逆亂小則違法制也

不立制度則未之前聞

言前此未聞有不立制度而可止亂息姦也

故曰以刑止刑以殺止殺

書大禹謨曰刑期于無刑民協于中時乃功懋哉
注云雖或行刑以殺止殺終無犯者

刑罰不可弛於國笞捶不得廢於家

弛廢也此譬喻治國之不可廢刑罰猶治家之不可無笞捶

時遇澆淳用有衆寡

澆薄也淳厚也謂遇時俗之淳則用刑少遭時俗之薄則用刑煩也

於是結繩啓路盈坎疏源

書序伏羲氏王天下造書契以代結繩之政注云伏羲以前未有文字大事結大繩小事結小繩易坎水流而不盈行險而不失其信爾雅坎律銓也此言盈坎疏源者言律之在天下如坎水之流行

而可信也

輕刑明威大禮崇敬

書湯誥曰肆台小子將天命明威不敢赦言國家
所以輕刑罰以明其威也禮記樂記曰大禮與天
地同節律疏云禮者敬之本敬者禮之興

易曰天垂象聖人則之觀雷電而制威刑觀秋霜而
有肅殺

易繫辭曰天垂象見吉凶聖人象之河出圖洛出

書聖人則之易象曰雷電噬嗑先王以明罰勅法
蓋震為雷則威離為電則明明而威用刑之象也
春秋符曰霜者刑罰之表也季秋霜始降鷹隼擊
王者順天行誅成肅殺之威

懲其未犯而防其未然平其徽纆而存乎博愛

懲誠也文選君子行詩曰君子防未然徽纆見易
坎卦言國家制刑懲一而誡百使之畏於未犯之
先不幸而麗於法則寬平其徽纆而心則主於博

愛之仁也

蓋聖王不獲已而用之

晉刑法志曰論其本意蓋有不得已而用之者焉
古者大刑用甲兵其次用斧鉞中刑用刀鋸其次用
鑽笮薄刑用鞭扑其所由來亦已尚矣

應劭曰蚩尤作亂不用帝命遂作五虐之刑

昔白龍白雲則伏羲軒轅之代

左傳昭公十七年鄭子曰昔者太皞氏即伏羲氏

也以龍紀故為龍師而龍名黃帝氏以雲紀故為雲師而雲名又史記曰黃帝少典之子姓公孫名軒轅官名雲師注云應劭曰黃帝受命有雲瑞故以雲紀事也春官為青雲夏官為紅雲秋官為白雲冬官為黑雲中官為黃雲今白龍白雲者掌刑之官也

西火西水則炎帝共工之年

左傳昭公十七年邾子曰炎帝氏即神農也以火

紀故為火師而火名共工氏以水紀故為水師而水名西亦刑官

鷄鳩筮賓於少皞

左傳昭公十七年邾子曰我高祖少皞摯之立也鳳鳥適至故紀於鳥為鳥師而鳥名下文鷄鳩氏司寇也注云鷹也鷙故為司寇主盜賊言筮賓所以出師以筮賓旅

金政策名於顓頊

家語黃帝德篇曰孔子顓頊黃帝之孫也昌意之子高陽金政者金屬西方亦司刑之官

咸有天秩典司刑憲

咸者皆也天秩者書臯陶謨曰天秩有禮自我五禮有庸哉即君之祿也典者主也司者管也憲者法也言自白龍至金政之官皆食君祿而主刑法也

大道之化擊壤無違

尚書序伏羲神農黃帝之書謂之三墳言大道也
周處風土記曰擊壤者以木作之前廣後銳長四
尺三寸其形如履將戲先側一壤於地遙於三四
十步以手中壤擊之中者為上部論衡曰帝時百
姓無事有五十之民擊壤於途觀者曰大哉堯之德
也擊壤者曰吾日出而作日入而息鑿井而飲耕
田而食帝何力於我哉言大道之時施教化使民
擊壤謳歌尚不違古以去刑法也

逮乎唐虞化行事簡

逮及也唐堯虞舜簡要也少也易繫辭曰堯舜垂衣裳而天下治論語曰無為而治者其舜也與荀子解蔽篇曰昔者舜之治天下也不以事詔而萬物成言唐虞之時教化通行其事簡少

議刑以定其罪畫象以媿其心

周禮以八辟麗邦法附刑罰議親議故議賢議能議功議貴議勤議賓晉刑法志曰五帝畫象而民

知禁舜典象以典刑吳氏曰圖所用刑之象以示
使智愚皆知王氏曰若周典垂刑象于象魏是也
所有條貫良多簡略年代浸遠不可得而詳焉

言唐虞之時其法甚多簡略但年代漸遠不可得
而備知之也

堯舜時理官則謂之為士而皋陶為之其法略存而
往概見

理官者齊職議曰大理古官也唐虞以皋陶作士

理官也劉馮事始曰舜以皋陶作士乃理獄之官也書舜典曰帝曰皋陶蠻夷猾夏寇賊姦宄汝作士五刑有服五服三就五流有宅五宅三居惟明克允故其法僅存而往往見其大槩也

則風俗通所云皋陶謨虞造律是也

虞書皋陶矢厥謨謨謀也

律者訓銓訓法也

律之與法文雖有殊其義一也爾雅釋言曰坎律

銓也郭璞注云易坎卦主法法律皆所以銓量輕重也

易曰理財正辭禁人爲非曰義

此周易下繫之辭也孔穎達疏曰言聖人治理其財用之有節正定號令之辭出之以理禁約其民爲非僻之事勿使行惡事謂之義義宜也言以此行之得其宜也

故銓量輕重依義制律

銓者平也書呂刑曰上刑適輕下服下刑適重上服輕重諸罰有權刑罰世輕世重

尚書大傳曰丕天之大律注云奉天之大法法亦律也故謂之為律

該說律意

昔者聖人制作謂之為經傳師所說則謂之為傳此則丘明子夏於春秋禮經作傳是也近代以來兼經注而明之則謂之為義疏疏之為字本以疏闊疏遠

立名又廣雅云疏者識也案疏訓識則書疏記識之道存焉

左傳序曰春秋者魯史記之名又曰懲惡而勸善非聖人孰能修之經者夫子之文章傳者丘明之善志蓋丘明受夫子之經所謂傳師所說又子夏為禮經之傳禮記經解曰疏通知遠而不誣則深于書者也疏者識也謂疏識於經顯彰其理而易通曉也

史記云後主所是疏為令前主所是著為律

史記杜周傳周為廷尉其治大抵倣張湯而候伺
上所欲擠者因而陷之上所欲釋者久繫待問而
微見其寃狀客有讓周曰君為天子決平不循三
尺法專以人主意指為獄獄者固如是乎周曰三
尺安在哉前主所是著為律後主所是疏為令當
時為是何古之法乎

漢書云削牘為疏故云疏也

該說疏意

昔者三王始用肉刑

三王夏禹殷湯周文武肉刑墨劓剕宮大辟

赭衣難嗣皇風更遠

前漢書載刑法志曰秦始皇專任刑罰躬操文墨
赭衣塞路圜圉成市嗣繼也言秦之暴虐難繼三
王之仁德也去三皇之風化愈更懸遠也

朴散淳漓傷肌犯骨

前漢武帝制曰殷人執五行以督姦傷肌膚以懲惡言去古浸遠淳古質朴之風漓散人多犯法為姦惡故用刑傷肌犯骨以懲治之也

尚書大傳曰夏刑三千條周禮司刑掌五刑其屬二千五百

周禮秋官司刑掌五刑之法墨罪五百劓罪五百宮罪五百剕罪五百大辟罪五百

繆王度時制法五刑之屬三千

書呂刑曰呂命穆王訓夏贖刑作呂刑墨罰之屬
千剝罰之屬千剝罰之屬五百宮罰之屬三百大
辟之罰其屬二百五刑之屬三千

周衰刑重戰國異制

前漢嚴安上書曰臣聞周有天下其治二百餘歲
成康其隆也刑措四十餘年而不用及其衰也亦
三百餘年故五伯更起五伯常佐天子興利除害
誅異禁邪匡國內以尊天子五伯既沒聖賢莫續

天子孤弱號令不行諸侯恣行強凌弱衆暴寡田
常纂齊六卿分晉並為戰國此民之始苦也言周
衰之時刑法嚴重戰國用刑各殊制度也

魏文侯師於李悝集諸國刑典造法經六篇一盜法
二賊法三囚法四捕法五雜法六具法

史記魏文侯名都師李悝集諸國刑典造法經六
篇一盜法今賊盜律是也二賊法今詐僞律是也
三囚法今斷獄律是也四捕法今捕亡律是也五

雜法今雜律是也六具法今名例律是也

商鞅傳授改法為律

史記商君者衛之庶孽公子名鞅姓公孫氏鞅少好刑名之學西入秦事孝公為相封之商於十五邑號為商君欲變法令既具未布乃立三丈木於市南門募人有徙置北門者與十金人怪莫敢徙復令曰能徙者與五十金一人徙之輒與五十金以明不欺其言改法為律者謂盜律賊律囚律捕

律雜律具律也

漢相蕭何更加惺所造戶興廐三篇謂九章之律

戶者戶婚律興者擅興律廐者廐庫律漢相蕭何又撰戶興廐三篇與前六篇共為九章之律

魏因漢律為一十八篇改漢具律為刑名第一

魏志劉劭字孔才廣平邯鄲人也魏明帝即位徵拜騎都尉與議即庾疑荀詵等定科令作新律十

八篇

晉命賈充等增損漢魏律為二十篇於魏刑名律中
分為法例律

晉書賈充字公閭晉帝有詔改定律令令賈充定
法律令與太傅郭冲等十四人典其事就漢九章
增十二篇仍其族類正其體號改舊律為刑名法
例辨囚律為告劾擊訊斷獄分盜律為請賕詐偽
水火毆亡因事類為宮衛違制律周官為諸侯律
合二十八篇六百二十條二萬七千六百五十七

言蠲其苛穢存其清約事從中興歸於益時

宋齊梁及後魏因而不改爰至北齊併刑名法例為
名例後周復為刑名隋因北齊更為名例唐因於隋
相承不改

宋高祖劉裕字德興齊太祖蕭道成字紹伯梁高
祖蕭衍字叔達陳高祖陳霸先字興國後魏聖武
帝諱詒汾北齊高歡字賀元渾渤海蓆人也後周
太祖文皇帝宇文泰字黑闥代郡武川人隋高祖

文皇帝楊堅宏農華陰人也唐高祖神聖皇帝李
淵其先隴西狄道人也

名者五刑之罪名例者五刑之體例名訓為命例訓
為比命諸篇之刑名比諸篇之法例但名因罪立事
由犯生命名即刑應比例即事表故以名例為首篇
第者訓居訓次則次第之義可得言矣一者太極之
氣函三為一黃鍾之一數所生焉名例冠十二篇之
首故云名例第一

律音義曰主物之謂名統凡之為例法例之名既衆要須例以表之故曰名例漢作九章散而未統魏朝始集罪例號為刑名晉賈充增律二十篇以刑名法例揭為篇冠至北齊趙郡王叡等奏上齊律十二篇併曰名例後循而不改

大唐皇帝以上聖凝圖英聲嗣武

皇帝高宗也凝固也圖基業也文選荅臨淄侯牋曰流千載之英聲嗣繼也武蹤也言高宗皇帝以

上聖之資固其基業以英雄之聲譽繼蹤先祖
潤春雲於品物緩秋官於黎庶

春雲以喻聖澤也文選褚淵碑文曰春雲等潤品
物萬物也易乾卦曰雲行雨施品物流形緩寬也
周易中孚卦曰君子以議獄緩死秋官掌刑之官
也周禮秋官大司寇曰乃立秋官而掌邦禁黎庶
百姓也文選西都賦曰膏澤洽于黎庶言霑聖澤
於萬物寬刑官於百姓

今之典憲前聖規模章程靡失鴻纖備舉

文選奏彈曰肅明典憲漢書曰規模宏遠漢高祖
命張蒼定章程詩傳曰大曰鴻小曰鴈鴻訓為大
纖者細微也謂律內大小之刑無不備舉

而刑憲之司執行殊異大理當其死生刑部處以流
刑一州斷以徒年一縣將為杖罰不有解釋觸塗睽
誤皇帝鼻憲在懷納隍興軫

唐官有省部寺監刑部大理寺俱掌刑縣統於州

流罪自五百里至三千里徒罪自一年一年半至三年杖自一百至六十徒罪斷於州杖罪斷於縣謂律雖有定而掌法之吏各有所司故所行或異若律文不以疏解釋明白則所觸之塗必有乖睽差誤也彛常憲法也隍城之溝也文選人若不得其所若已納之於隍軫念也

德禮為政教之本刑罰為政教之用猶昏曉陽秋相須而成者也

論語道之以德齊之以禮德禮猶曉與陽刑罰猶昏與秋言德禮與刑罰猶昏曉相須而成一晝夜春陽與秋陰相須而成一歲也

是以降綸言於台鉉揮折簡於髦彥

禮記緇衣篇曰王言如絲其出如綸王言如綸其出如綽以喻君之詔也春秋漢舍孳曰三公在天法三台也易鼎卦曰鼎黃耳金鉉鄭玄曰金鉉諭明道能舉君之官職也以喻台相文選石闕銘曰

折簡而禽廬九張銑註曰折簡謂策書詩曰髦士
攸宜爾雅曰美士為彥言天子降詔詞於台相揮
折簡在於髦彥之士也

爰造律疏大明典式遠則皇王妙旨近則蕭賈遺文
詩我將篇曰儀式刑文王之典日靖四方蕭賈遺
文謂漢蕭何晉賈充等所制篇章也

沿波討源自枝窮葉

文選陸士衡文賦曰或因枝以振葉或沿波而討

源言律疏無不盡義

甄表寬大裁成簡久

甄明也表顯也裁制也書大禹謨曰臨下以簡御衆以寬言明顯寬大之恩制成簡久之法

譬權衡之知輕重若規矩之得方圓

荀子禮論篇曰禮之於正國也猶權衡之於輕重也繩墨之於曲直也規矩之於方圓也故權衡誠懸則不可欺以輕重繩墨誠陳則不可欺以曲直

規矩誠設則不可欺以方圓君子審禮不可欺以詐偽

邁彼三章同符畫一者矣

史記高祖入關與父老約法三章殺人者死傷人及盜抵罪前漢蕭何為相死曹參代之百姓歌曰蕭何為法講若畫一曹參代之守而勿失載其清淨人以寧壹

五刑

笞刑五 杖刑五 徒刑五 流刑三 死刑二

笞刑五

笞一十

贖銅
一斤

笞二十

贖銅
二斤

笞三十

贖銅
三斤

笞四十

贖銅
四斤

笞五十

贖銅
五斤

疏義曰笞者擊也又訓為恥言人有小愆法須懲誡故加捶撻以恥之漢時笞則用竹今時則用楚故書云朴作教刑即其義也漢文帝十三年太倉令淳于意女緹縈上書願沒入為官婢以贖父刑帝悲其意

遂改肉刑當黥者鉗為城奴令舂當劓者笞三百
此即笞杖之目未有區分笞擊之刑刑之薄者也隨
時沿革輕重不同俱期無刑義唯必措孝經援神契
云聖人制五刑以法五行禮云刑者側也成也一成
而不可變故君子盡心焉孝經鉤命決云刑者側也
質罪示終然殺人者死傷人者刑百王之所同其所
由來尚矣從笞十至五十其數有五故曰笞刑五徒
杖之數亦準此

杖刑五

杖六十

贖銅六斤

杖七十

贖銅七斤

杖八十

贖銅八斤

杖九十

贖銅九斤

杖一百

贖銅十斤

疏義曰說文云杖者持也而可以擊人者歟家語云
舜之事父小杖則受大杖則走國語云薄刑用鞭扑
書云鞭作官刑猶今之杖刑者也又蚩尤作五虐之
刑亦用鞭扑原其濫賜所從來遠矣漢景帝以笞者
已死而笞未畢改三百曰二百二百曰一百奕代沿

流曾微增損爰洎隋室以杖易鞭今律云累決笞杖者不得過二百蓋循漢制也

徒刑五

一年

贖銅二十斤

一年半

贖銅三十斤

二年

贖銅四十斤

二年

半

贖銅五十斤

三年

贖銅六十斤

疏義曰徒者奴也蓋奴辱之周禮云其奴男子入于罪隸又任之以事實以園土而收教之上罪三年而捨中罪二年而捨下罪一年而捨此並徒刑也蓋始

於周

流刑三

二千里

贖銅八十斤

二千五百里

贖銅九十斤

三千里

贖銅一百斤

斤

疏義曰書云流宥五刑謂不忍刑殺宥之于遠也又曰五流有宅五宅三居大罪投之四裔或流之于海外次九州之外次中國之外蓋始於唐虞今之三流即其義也

死刑二

問答

絞斬

贖銅一百二十斤

疏義曰古先哲王則天垂法輔政助化禁暴防姦本欲生之義期止殺絞斬之坐刑之極也死者魂氣歸於天形魄歸於地與萬化冥然故鄭註禮云死者漸也消盡為漸春秋元命包云黃帝斬蚩尤於涿鹿之野禮云公族有死罪罄之于甸人故知斬自軒轅絞與周代二者法陰數也陰主殺罰因而則之即古大

辟之刑是也

問曰答以上死以下皆有贖法未知贖刑起自何代
答曰書云金作贖刑註云誤而入罪出金以贖之甫
侯訓夏贖刑云墨辟疑赦其罰百鍰劓辟疑赦其罰
唯倍剕辟疑赦其罰倍差宮辟疑赦其罰六百鍰大
辟疑赦其罰千鍰註云六兩曰鍰鍰黃鐵也晉律應
八議以上皆留官收贖勿髡鉗答也今古贖刑輕重
異制品目區別備有章程不假臆陳無煩縷說

十惡

問答
二

疏義曰五刑之中十惡尤切虧損名教毀裂冠冕特標篇首以為明誠其數甚惡者事類有十故稱十惡然漢制九章雖並湮沒其不道不敬之目見存原夫厥初蓋起諸漢案梁陳已往略有其條周齊雖具十條之名而無十惡之目開皇創制始備此科酌於舊章數存於十大業有造復更刊除十條之內唯存其八自武德以來仍遵開皇無所損益

一曰謀反

謂謀危社稷

疏義曰案公羊傳云君親無將將則必誅謂將有逆心而害於君父者則必誅之左傳云天反時為災人反德為亂然王者居宸極之至尊奉上天之大寶命同二儀之覆載作兆庶之父母為子為臣惟忠惟孝乃敢包藏凶慝將起逆心規反天常悖逆人理故曰謀反

註謂謀危社稷

疏義曰社為五土之神稷為田正也所以神地道主
司嗇君為神主食乃人天主秦即神安神寧即時稔
臣下將圖逆節而有無君之心君位若危神將安恃
不敢指斥尊號故託云社稷周禮云左祖右社人君
所尊也

二曰謀大逆

謂謀毀宗廟
山陵及宮闕

疏義曰此條之人干紀犯順違道悖德逆莫大焉故
曰大逆

註謂謀毀宗廟山陵及宮闕

疏義曰有人獲罪於天不知紀極潛思釋憾將圖不逞遂起惡心謀毀宗廟山陵及宮闕宗者尊也廟者貌也刻木為主敬象尊容置之宮室以時祭享故曰宗廟山陵者古先帝王因山而葬黃帝葬橋山即其事也或云帝王之葬如山如陵故曰山陵宮者天有紫微宮人君則之所居之處故曰宮其闕者爾雅釋宮云觀謂之闕郭璞云宮門雙闕也周禮秋官正月

之吉懸刑象之法於象魏使人觀之故謂之觀

三曰謀叛

謂謀背國從僞

疏義曰人有謀背本朝將投蕃國或欲翻城從僞或欲以地外奔即如呂牟夷以牟婁來奔公山費叛之類

四曰惡逆

謂毆及謀殺祖父母父母殺伯叔父母姑兄姊外祖父母夫夫之祖父母父母者

疏義曰父母之恩昊天罔極嗣續妣祖承奉不輕梟鏡其心愛敬同盡五服至親自相屠戮窮惡盡逆絕

棄人理故曰惡逆

註謂毆及謀殺祖父母父母殺伯叔父母姑兄弟外
祖父母夫夫之祖父母父母者

疏義曰毆謂毆擊謀謂謀計自伯叔以下即據殺訖
若謀而未殺自當不睦之條惡逆者常赦不免決不
待時不睦者會赦合原唯止除名而已以此為別故
立制不同其夫之祖父母者夫之曾高祖亦同案喪
服制為夫曾高服總麻若夫承重其妻於曾高祖亦

如夫之父母服期故知稱夫之祖父母曾高亦同也
問曰外祖父母及夫據禮有等數不同具為分析
答曰外祖父母但生母身有服無服並是外祖父母
所以如此者律云不以尊壓及出降故也若不生母
身者有服同外祖父母無服同凡人依禮嫡子為父
後及不為父後者並不為出母之黨服即為繼母之
黨服此兩黨俱是外祖父母若親母死於室為親母
之黨服不為繼母之黨服此繼母之黨無服即同凡

人又妾子為父後及不為父後者嫡母存為其黨服
嫡母亡不為其黨服禮云所從亡者則已此既從嫡
母而服故嫡母亡其黨則已夫則依禮有三月廟見
有未廟見或就婚等三種之夫並同夫法其有克吉
日及定婚夫等唯不得違約改嫁自餘相犯並同凡
人

五曰不道

謂殺一家非死罪三人及
支解人造畜蠱毒厭魅

疏義曰安忍殘賊背違正道故曰不道

註謂殺一家非死罪三人及支解人

疏義曰謂一家之中三人被殺俱無死罪者若三人之內有一人合死及於數家各殺二人唯合死刑不入十惡或殺一家三人本條罪不至死亦不入十惡支解人者謂殺人而支解亦據本罪合死者

註造畜蠱毒厭魅

疏義曰謂造合成蠱雖非造合乃傳畜堪以害人者皆是即未成者不入十惡厭魅者其事多端不可具

述皆謂邪俗陰行不軌欲令前人疾苦及死者

六曰大不敬

謂盜大祀神御之物乘輿服御物盜及偽造御寶合和御藥誤不如本方及封題誤

若造御膳誤犯食禁御幸舟船誤不牢固指斥乘輿情理切害及對捍制使而無人臣之禮

疏義曰禮者敬之本敬者禮之與故禮運云禮者君之柄所以別嫌明微考制度別仁義責其所犯既大皆無肅敬之心故曰大不敬

註謂盜大祀神御之物乘輿服御物

疏義曰大祀者依祠令昊天上帝五方上帝皇地祇

神州宗廟等為大祀職制律又云凡言祀者祭享同
若大祭大享並同大祀神御之物者謂神祇所御之
物本條註云謂供神御者帷帳几杖亦同造成未供
而盜亦是酒醴饌具及籩豆簠簋之屬在神前而盜
者亦入大不敬不在神所盜者非也乘輿服御物者
謂主上服御之物人主以天下為家乘輿巡幸不敢
指斥尊號故託乘輿以言之本條註云服通衾茵之
屬真副等皆須監當之官部分擬進乃為御物

註盜及偽造御寶

疏義曰說文云璽者印也古者尊卑共之左傳云襄公自楚還及方城季武子取卞使公治問璽書追而予之是其義也秦漢以來天子曰璽諸侯曰印開元歲中改璽曰寶本條云偽造皇帝八寶此言御寶者為攝三后寶並入十惡故也

註合和御藥誤不如本方及封題誤

疏義曰合和御藥雖憑正方中間錯謬誤違本法封

題誤者謂依方合訖封題有誤若以丸為散應冷言熱之類

註若造御膳誤犯食禁

疏義曰周禮食醫掌王之八珍所司特宜敬慎營造御膳須憑食經誤不依經即是不敬

註御幸舟船誤不牢固

疏義曰帝王所之莫不慶幸舟船既擬供御故曰御幸舟船工匠造船備盡心力誤不牢固即入此條但

御幸舟船以上三事皆為因誤得罪設未進御亦同
十惡如其故為即從謀反科罪其監當官司準法減
科不入不敬

註指斥乘輿情理切害

疏義曰此謂情有缺望發言謗毀指斥乘輿情理切
害者若使無心怨天唯欲誣構人罪自依反坐之法
不入十惡之條舊律云言理切害今改為情理切害
者蓋欲原其本情廣恩慎罰故也

註及對捍制使而無人臣之禮

疏義曰奉制出使宣布四方有人對捍不敬制命而無人臣之禮者制使者謂奉勅定名及令所司差遣者是也

七曰不孝

謂告言詛詈祖父母父母及祖父母父母在別籍異財若供養有闕居父母喪身自嫁娶

若作樂釋服徒吉聞祖父母父母喪匿不舉哀詐稱祖父母父母死

疏義曰善事父母曰孝既有違犯是名不孝

註謂告言詛詈祖父母父母

疏義曰本條直云告祖父母父母此註兼云告言者
文雖不同其義一也詛猶呪也詈猶罵也依本條詛
欲令死及疾苦者皆以謀殺論自當惡逆唯詛求愛
媚始入此條

問曰依賊盜律子孫於祖父母父母求愛媚而厭呪
者流二千里然厭魅呪詛罪無輕重今詛為不孝未
知厭入何條

答曰厭呪雖復同文理乃詛輕厭重但厭魅凡人則

入不道若呪詛者不入十惡名例云其應入罪者則
舉輕以明重然呪詛是輕尚入不孝明知厭魅是重
理入此條

註及祖父母父母在別籍異財

疏義曰祖父母父母在子孫就養無方出告反面無
自專之道而有異財別籍情無至孝之心名義以之
俱淪情節於茲並棄稽之典禮罪惡難容二事既不
相須違者並當十惡

註若供養有闕

疏義曰禮云孝子之養其親也樂其心不違其志以其飲食而忠養之其有堪供而闕者祖父父母告乃坐

註居父母喪身自嫁娶若作樂釋服從吉

疏義曰居父母喪身自嫁娶皆謂首從得罪者若其獨坐主婚男女即非不孝所以稱身自嫁娶以明主婚不同十惡故也其男夫居喪娶妾合免所居之一

官女子居喪為妾得減妻罪三等並不入不孝若作樂者自作遣人等樂謂擊鐘鼓奏絲竹匏磬塤箎歌舞散樂之類釋服從古謂喪制未終而在二十七月之內釋去衰裳而著吉服者

註聞祖父母父母喪匿不舉哀及詐稱祖父母父母死

疏義曰依禮聞親喪以哭答使者盡哀而問故父母之喪創巨尤切聞即崩殞擗踊號天今乃匿不舉哀

或揀擇時日者並是其詐稱祖父父母死謂祖父

母父母見在而詐稱死者若先死其詐稱始死者非

八曰不睦

謂謀殺及賣總麻以上親毆告夫及大功以上尊長小功尊屬

疏義曰禮云講信修睦孝經云民用和睦睦者親也此條之內皆是親族相犯為九族不相叶睦故曰不睦

註謂謀殺及賣總麻以上親

疏義曰但有謀殺及賣總麻以上親無問尊卑長幼

總入此條若謀殺期親尊長等殺訖即入惡逆今直言謀殺不言故鬪若故鬪殺訖亦入不睦舉謀殺未傷是輕明故鬪已殺是重輕重相明理同十惡賣總麻以上親者無問強和俱入不睦賣未售者非

註毆告夫及大功以上尊長小功尊屬

疏義曰依禮夫者婦之天又云妻者齊也恐不同尊長故別言夫號大功尊長者依禮男子無大功尊唯婦人於夫之祖父母及夫之伯叔父母是大功尊大

功長者謂從父兄姊是也以上者伯叔父母姑兄姊之類小功尊屬者謂從祖父母姑從祖伯叔父母姑外祖父母舅姨之類

九曰不義

謂殺本屬府主刺史縣令見受業師吏卒殺本部五品以上官長及聞夫喪匿不舉哀若

作樂釋服從吉及改嫁

疏義曰禮之所尊尊其義也此條元非血屬本止以義相從背義乖仁故曰不義

註謂殺本屬府主刺史縣令見受業師

疏義曰府主者依令職事官五品以上帶勳官三品
以上得親事帳內於所事之主名為府主國官邑官
於其所屬之主亦與府主同其都督刺史皆據制書
出日六品以下皆據見訖始是見受業師謂服膺儒
業而非私學者若殺訖入不義謀而未殺自從雜犯
註吏卒殺本部五品以上官長

疏義曰吏謂流外官以下卒謂庶士衛士之類此等
色人類例不少有殺本部五品以上官長並入不義

官長者依令諸司尚書同官長之例

註及聞夫喪匿不舉哀若作樂釋服從吉及改嫁

疏義曰夫者妻之天也移父之服而服為夫斬衰恩義既崇聞喪即須號慟而有匿哀不舉居喪作樂釋服從吉改嫁忘憂皆是背禮違義故俱為十惡其改嫁為妾者非

十曰內亂

謂姦小功以上親父祖妾及與和者

疏義曰左傳云女有家男有室無相瀆易此則亂若

有禽獸其行朋淫於家紊亂禮經故曰內亂

註謂姦小功以上親

疏義曰姦小功以上親者謂據禮男子為婦人著小功服而姦者若婦人為男夫雖有小功之服男子為報服總麻者非謂外孫女於外祖父及外甥於舅之類

註父祖妾及與和者

疏義曰父祖妾者有子無子並同媵亦是及與和謂

婦人共男子姦者並入內亂若被強姦後遂和可
者亦是

八議

疏義曰周禮云八辟麗邦法今之八議周之八辟也
禮云刑不上大夫犯法則在八議輕重不在刑書也
其應議之人或分派天潢或宿侍旒宸或多才多藝
或立事立功簡在帝心勲書王府若犯死罪議定奏
裁皆須取決宸衷曹司不敢與奪此謂重親賢敦故

舊尊賓貴尚功能也以此八議之人犯死罪皆先奏請議其所犯故曰八議

一曰議親

謂皇帝祖免以上親及太皇太后皇太后總麻以上親皇后小功以上親

疏義曰義取內睦九族外叶萬邦布雨露之恩篤親親之理故曰議親袒免者據禮有五高祖兄弟曾祖從父兄弟祖再從兄弟父三從兄弟舅之四從兄弟是也

註及太皇太后皇太后總麻以上親

疏義曰太皇太后者皇帝祖母也皇太后者皇帝母也加太者太之言大也易稱太極蓋取尊大之義稱皇者因子以明母也其二后蔭及總麻以上親總麻之親有四曾祖兄弟祖從父兄弟父再從兄弟舅之三從兄弟是也

註皇后小功以上親

疏義曰皇后蔭小功以上親者降姑之義小功之親有三祖之兄弟父之從父兄弟舅之再從兄弟是也

此數之外據禮內外諸親有服同者並準此

二曰議故

謂故舊

疏義曰謂宿得侍見特蒙接遇歷久者

三曰議賢

謂有大德行

疏義曰謂賢人君子言行可為法則者

四曰議能

謂有大才業

疏義曰謂能整軍旅莅政事鹽梅帝道師範人倫者

五曰議功

謂有大勲功

疏義曰謂能斬將搴旗摧鋒萬里或率衆歸化寧濟
一時匡救艱難銘功太常者

六曰議貴

謂職事官三品以上散官
二品以上及爵一品者

疏義曰依令有執掌者為職事官無職掌者為散官

爵謂國公以上

七曰議勤

謂有大
勤勞

疏義曰謂大將吏恪居官次夙夜在公若遠使絕域

經涉險難者

八曰議賓

謂承先代之
後為國賓者

疏義曰書云虞賓在位羣后德讓詩曰有客有客亦
白其馬禮云天子存二代之後猶尊賢也昔武王克
商封夏后氏之後於杞封殷氏之後於宋若今周後
介公隋後鄫公並為國賓也

唐律疏義卷一